

四庫全書

子部

欽定四庫全書

冊府元龜卷三百七十七

宋 王欽若等 撰

將帥部

褒異第三

蜀諸葛亮為軍師中郎將督零陵桂陽長沙三郡漢獻
帝建安十六年益州牧劉璋遣法正迎先主使擊張魯
亮與關侯鎮荊州先主自葭萌還攻璋亮與張飛趙雲
等率衆泝江分定郡縣與先主共圖成都成都平以亮

為軍師將軍署左將軍府事先主外出亮常鎮守成都
先主即位策亮為丞相後王建興三年春亮率衆南征
賜亮金鈇鉞一具曲蓋一前後羽葆鼓吹各一部虎賁
六十人十二年八月亮疾病卒於軍詔策曰惟君體資
丈武明睿篤誠受遺託孤贊輔朕躬繼絕興微志存靖
亂爰整六師無歲不征神武赫然威振八荒將建殊功
於季漢參伊周之巨勲如何不弔事臨垂克邁疾隕喪
朕用傷悼肝心若裂夫崇德序功紀行命謚所以光昭將

來刊載不朽今使使持節左中郎將杜瓊贈君丞相武鄉侯印綬謚君為忠武侯

張飛為中郎將先主奔江南曹公追之及於當陽之長阪飛拒後敵皆無敢當故遂得免先主既定江南以飛為宜都太守征虜將軍封新亭侯後轉在南郡先主入益州還攻劉璋飛與諸葛亮等沂流而上分定郡縣至江州破璋將巴郡太守嚴顏生獲顏飛所過戰克與先主會于成都益州既平賜諸葛亮法正飛及關侯各金

五百斤銀千斤錢五十萬錦千足以飛領巴西太守又破張郃軍於巴西先主為漢王拜飛為右將軍假節章武元年遷車騎將軍領司隸校尉進封西鄉侯

馬超為偏將軍封都亭侯後自稱征西將軍領并州牧督涼州軍事聞先主圍劉璋於成都密書請降先主遣人迎超超將兵徑到城下城中震怖璋即稽首以超為平西將軍督臨沮因為前都亭侯先主為漢中王拜超為左將軍假節章武元年遷驃騎將軍領涼州牧進封叅鄉侯

黃忠南陽人先主南定諸郡忠從入蜀自葭萌受任還攻
劉璋忠常先登陷陣勇冠三軍益州既定拜為討虜
將軍又於漢中定軍山擊夏侯淵淵軍大敗遷征西將
軍

趙雲為牙門將軍先主入蜀雲留荊州先主自葭萌還
攻劉璋召諸葛亮亮率雲與張飛等俱沂江西上平定
郡縣至江州分遣雲從外水上江陽與亮會于成都成
都既定以雲為翊軍將軍後王建興元年為中護軍征

南將軍封永昌亭侯

龐統字士元與諸葛亮並為軍師中郎將亮留鎮荊州
統隨從入蜀益州牧劉璋與先主會涪統進策先主然
其計所過輒克進圍雒縣統率眾攻城為流矢所中卒
時年三十六先主痛惜言則流涕拜統父議郎遷建議
議大夫諸葛亮親為之拜追賜統爵關內侯

麋竺字子仲先主將適荊州遣竺先與劉表相聞以竺
為左將軍從事中郎益州平拜安漢將軍班在軍師將

軍之右竺雍容敦雅而幹翮非所長先主待之以上賓之禮未嘗有所統御然賜賞優寵無與為比

劉封長沙劉氏之甥也先主至荊州以未有繼嗣養封為子及先主入蜀自葭萌還攻劉璋封年二十餘有武藝氣力過人將兵與諸葛亮張飛等沂流西上所在戰克益州既定以封為副軍中郎將

李嚴為裨將軍成都既定為捷為太守興業將軍先主在漢中嚴率將郡士五千人討賊馬秦高勝等斬之又

越雋夷率高定遣軍圍新道縣嚴馳往赴救賊皆破走
加輔漢將軍

魏延以部曲隨先主入蜀數有戰功遷牙門將軍先主
為漢中王遷治成都乃拔延為督漢中鎮遠將軍領漢
中太守先主踐尊號進拜鎮北將軍後主建興元年封
都亭侯五年諸葛亮駐漢中更以延為督前部領丞相
司馬涼州刺史八年使延西入羗中魏後將軍費瑤雍
州刺史郭淮與延戰于陽谿延大破淮等遷為前軍師

征西大將軍假節進封南鄭侯

霍峻為中郎將守葭萌城劉璋將扶禁向存等攻圍峻峻選精銳出擊大破之即斬存首先主定蜀嘉峻之功乃分廣漢為梓潼郡以峻為梓潼太守裨將軍在官三年卒葬成都先主甚悼惜詔諸葛亮曰峻既佳士加有功於國今欲行酹遂親率羣僚臨會弔祭因留宿墓上當時榮之

向寵為牙門將穉歸之敗寵營特完後主建興元年封

都亭侯

黃權為偏將軍破杜濩朴胡殺夏侯淵據漢中皆權本謀也先主為漢中王猶領益州牧以權為治中從事及稱尊號將東伐吳先主以權為鎮北將軍督江北軍以防魏師

李恢為庾隆都督使持節領交州刺史住平夷縣先主薨高定恣睢於越雋雍閭跋扈於建寧朱褒反叛於牂牁恢按道向建寧諸縣大相糾合圖恢軍於昆明恢出

擊大破之軍功居多封漢興亭侯加安漢將軍

馬忠代張翼為庾降都督時南夷豪帥劉胄反擾亂諸郡忠遂斬胄平南土加忠監軍奮威將軍封博陽亭侯又越雋郡亦失土地忠率將太守張嶷復雋郡繇此就加安南將軍進封彭鄉亭侯後主延熙五年還朝因至漢中見大司馬蔣琬宣傳詔旨加拜鎮南大將軍

王平為討寇將軍諸葛亮圍祁山平別守南圍魏大將軍司馬宣王攻亮張郃攻平平堅守不動郃不能克亮

卒於武功退軍還魏延作亂一戰而敗平之功也遷後
典軍安漢將軍

劉敏為左護軍揚威將軍與王平俱鎮漢中魏軍襲蜀敏
帥所領與平會大將軍費禕從成都至魏軍即退敏以
功封雲亭侯

姜維為衛將軍率衆討定汶山平康夷又降胡王治無
戴等部落假維節又大破魏雍州刺史王經於洮西就
遷為大將軍

張翼為前軍都督以討叛帥劉胄賜爵關內侯

吳懿為關中都督與魏延入南安界破魏將費瑤徙亭侯進封高鄉侯

吳張奮昭之弟子也領兵為將軍連有功效至平州都督封樂鄉亭侯

顧承為吳郡西部都尉與諸葛恪等共平山越別得精兵八千人還屯章阮拜昭義中郎將

周瑜為前部大都督魏曹仁守江陵城瑜遣甘寧前據

夷陵仁圍寧寧告急於瑜大戰勒兵就陣仁繇是遂退
大帝拜瑜偏將軍病卒大帝素服舉哀感動左右喪當
還吳又迎之蕪湖衆事費度一為供給後著令曰故將
軍周瑜其有人客皆不得問

魯肅字子敬為贊軍校尉與周瑜拒曹公曹公破走肅
即先還大帝請諸將迎肅肅將入閣拜大帝起禮之因
謂曰子敬孤持鞍下馬相迎足以顯卿未肅趨進曰未
也衆人聞之無不愕然就坐徐舉鞭言曰願至尊威德

加乎四海總括九州克成帝業更以安車軟輪徵始當
顯耳大帝撫掌歡笑後拜奮武將軍初住江陵後下屯
陸口威信大行拜漢昌太守偏將軍又從大帝破皖城
轉橫江將軍

呂蒙字子明為平北都尉領廣德長從征黃祖蒙勒前
鋒親梟祖都督陳就首將士乘勝進攻其城祖聞就死
委城走兵追禽之以蒙為橫野中郎將賜錢千萬又周
瑜使甘寧前據夷陵曹仁分衆圍寧蒙乃擊曹仁退走

遂據南郡撫定荊州還拜偏將軍大帝親征皖引諸將
問以計策蒙薦甘寧為升城督督攻在前蒙以精銳繼之
侵晨進攻蒙手執袍鼓士卒皆騰踊自升食時破之既
而張遼至夾石聞城已拔乃退大帝嘉其功即拜廬江
太守所得人馬皆分與之別賜尋陽屯田六百戶官屬
三十人後曹公大出濡須以蒙為督據前所立塢置疆
弩萬張於其上以拒曹公曹公前鋒屯未就蒙攻破之
曹公引退拜蒙左護軍虎威將軍魯肅卒蒙西屯陸口

肅軍人馬萬餘盡以屬蒙又拜漢昌太守降關羽之衆

羽父子俱獲荊州遂定以蒙為南郡太守封孱陵侯

大帝

於公安大會呂蒙以疾辭大帝笑曰擒羽之功子明謀也今功已捷慶賞未行豈邑邑耶乃增給步騎鼓吹勅拜畢還營兵馬尊從前後鼓吹光耀于路賜錢一億黃

金五百斤蒙固辭金錢大帝不許封爵未下會蒙疾發

大帝時在公安迎至內殿所以治護者萬方募封內有能愈蒙疾者賜千金時有鍼加大帝為之慘感欲數見其顏色又恐勞動常穿壁瞻之見小能下食則喜顧左

右言笑不然則咄咄夜不能寐病稍瘳為下赦令羣臣畢
賀後更增篤大帝自臨視命道士壇於星辰下為之請
命年四十二遂卒於內殿時大帝哀痛甚為之降損蒙
未死時所得金寶諸賜盡付府藏勅主者命絕之日皆
上還喪事務約大帝聞之益以悲感蒙子霸襲爵與守
冢三百家復田五十頃

程普為盪寇將軍與周瑜破曹公於烏林又進攻南郡
走曹仁拜裨將軍領江夏太守治沙羨食四縣

黃蓋為武鋒中郎將武陵太守討平夷蠻及山賊加偏將軍

韓當為別部司馬及孫策東渡從討三郡遷先登校尉後以中郎將與周瑜等拒破曹公又與呂蒙襲取南郡遷偏將軍領永昌太守宜都之役與陸遜朱然等共攻蜀軍於涿鄉大破之徙威烈將軍封都亭侯

蔣欽為西部都尉討平會稽冶賊呂合秦狼等遷討越中郎將以經拘昭陽為奉邑又從大帝征合肥力戰有

功遷盪寇將軍後召還都拜津右護軍大帝嘗入其堂內
嘆其在貴守約即勅御府為母作錦被改易帷帳妻妾
衣服悉皆錦繡大帝討闕羽欽督水軍入沔還道病卒
大帝素服舉哀以蕪湖民二百戶田二百頃給妻子子
壹封宣城侯

周泰為別部司馬從大帝討六縣山賊奮激投身衛大
帝膽氣倍人左右繇泰竝能就戰賊既散身被二十創
是日無泰大帝幾危殆補春穀長後從攻皖及討江夏

還過豫章復補宜春長所在皆食其征賦從討黃祖有
功後與周瑜程普拒曹公於赤壁攻曹仁於南郡荊州
平定將兵屯岑曹公出濡須泰復赴擊曹公退留督濡
須拜平虜將軍時朱然徐盛等皆在所部並不伏也大
帝為案行至濡須塢因會諸將大為酣樂大帝自行酒
到泰前因命泰解衣大帝手自指其創痕問以所起泰
輒記昔戰鬪處以對畢使復服歡讌極夜其明日遣使
者授以御蓋

江表傳曰權勅以已常所用御績青練蓋賜之坐罷住駕使泰以兵馬導從出鳴鼓

角作
鼓吹

後大帝破闕羽欲進圖蜀拜秦漢中大守奮威將

軍封陵陽侯

周邵者秦之子也以騎都尉領兵曹仁出濡須戰有功
又從破曹休進位裨將軍

陳武為部司馬督五校累有功勞進位偏將軍從大帝
擊合肥戰死大帝哀之命以其愛妾殉葬復客二百家
陳修武之子也為別部司馬授兵五百人修撫循得意
大帝竒之拜為校尉

陳表為右部督封都亭侯領新安都尉鄱陽民吳遽等為亂表便越界赴討遽以破敗遂降陸遜拜表偏將軍進封都鄉侯

董襲為揚武都尉鄱陽賊彭龍彭虎等眾數萬人襲討之旬日盡平拜威越校尉遷偏將軍襲死大帝改服臨殯供給甚厚

甘寧為西陵太守從大帝攻皖為升城督寧為吏士先卒破獲朱光拜折衝將軍

凌統為別部司馬大帝征江夏統為前鋒先搏其城於是
是大獲大帝以統為承烈都尉又從破皖拜盪寇中郎
將後病卒大帝聞之拊床起坐哀不能止使張承為作

銘誄二子烈封

二子名

年各數歲大帝內養於宮愛待與

諸子同賓客進見呼示之曰此吾虎子也及八九歲令
葛光教之讀書十日一令乘馬追錄統功封烈亭侯

徐盛為別部司馬授兵五百人守柴桑長拒黃祖祖子
射開門出戰大破之大帝以為校尉領蕪湖令復討臨

成南阿山賊有功徙中郎將督校兵

潘璋東郡發干人大帝使召募百餘人遂以為將討山賊有功署別部司馬後遷豫章西安長合肥之役諸將不備璋便馳進兵皆還戰大帝甚壯之拜偏將軍大帝征關羽璋與朱然斷羽走道拜璋振威將軍封溧陽侯甘寧卒又并其軍蜀先主出夷陵璋與陸遜并力拒之璋部下斬蜀護軍馮習等所殺傷甚衆拜平北將軍朱治為九真太守行扶義將軍割婁絲拳無錫毗陵為

奉邑置長吏黃武二年拜安國將軍金印紫綬徙封故
鄣大帝自歷位上將及為侯王治每進見大帝常親迎
執版交拜享宴贈賜恩敬特隆至從行吏皆得奉贄私
覲其見異如此大帝嘗歎治憂勤王事性儉約雖在富貴
車服惟供事大帝優異之自令督軍御史典屬城文書
治領四縣租稅而已

朱然為臨川太守大帝授兵一千人會山賊盛起然平
討旬日而定曹公出濡須然備大塢及三關屯拜偏將

軍又從討關羽別與潘璋到臨沮禽羽遷昭武將軍封
西安鄉侯又蜀先主舉兵攻宜都然督五千人與陸遜
並力拒先主先主遂破走拜征北將軍封永安侯後拜
車騎將軍征租中魏將李興等聞然深入斷然後道然
夜出逆之軍以勝反大帝遣使拜然左大司馬右軍師
寢疾二年後漸增篤大帝為減膳夜為不寐中使醫藥
口食之物相望於道然每遣使表疾病消息大帝輒召
見口自問訊入賜酒食出送布帛自創業功臣疾病大

帝意之所鍾呂蒙凌統最重然其次矣赤烏十二年卒
大帝素服舉哀為之感慟

呂範字子衡為宛陵令討破丹陽賊還吳遷都督又從
孫策攻祖郎於陵陽太史慈於勇里七縣平定拜征虜
中郎將及大帝征江夏曹公至赤壁範與周瑜等俱拒
破之拜裨將軍領彭澤太守以彭澤柴桑歷陽為奉邑
蜀先主詣京見大帝範密請留先主後遷平南將軍屯
柴桑大帝討關羽過範館謂曰昔早從卿言無此勞也

今當上取之卿為我守建業大帝破羽還都武昌拜範
建威將軍封宛陵侯領丹陽太守治建業督扶州以下
至海轉以溧陽懷安寧國為奉邑曹休張遼臧霸等來
伐範督徐盛全琮孫韶等以舟師拒休等於洞口遷前
將軍假節改封南昌侯黃武七年範遷大司馬印綬未
下疾卒大帝素服舉哀而遣使者追贈印綬及還都建
業大帝過範墓呼曰子衡言及涕泣祀以太牢

呂據為安軍中郎將數討山賊諸深惡劇地所擊皆破

隨太常潘濬討五谿復有功朱然攻樊據與朱異破城
外圍還拜偏將軍入補馬閑右部督遷越騎校尉太元
元年大風江水溢流漸淹城門大帝使視水獨見據使人
取大船以備害大帝嘉之拜濬魏將軍

朱桓為盪寇校尉桓督領諸將討丹陽鄱陽山賊皆平
定稍遷裨將軍封新城亭侯後代周泰為濡須督敗魏
曹仁軍於中洲溺死者千餘大帝嘉桓功封嘉興侯遷
奮武將軍領彭城相黃龍元年拜前將軍領青州牧假

節赤烏元年卒大帝賜鹽五千斛以周喪事

朱異為騎都尉隨朱然攻魏樊城建計破其外圍還拜
偏將軍又破魏廬江太守文欽七屯遷揚武將軍

駱統為建中郎將大帝以統隨陸遜破蜀軍於宜都遷
偏將軍黃武初統與嚴圭共破魏曹仁軍於中洲封新
陽亭侯

陸遜為海昌屯田都尉并領縣事討鄱陽賊帥尤突拜
定威校尉軍屯利浦大帝以兄策女配遜數訪世務大

帝納其策以為帳下右部督後為偏將軍右部督陳關羽可擒之要大帝乃潛軍而上使遜與呂蒙為前部至即克公安南郡遜徑進領宜都太守拜撫邊將軍封華亭侯遜遣將軍李異等攻蜀將詹晏等破之又攻破房陵太守鄧輔南鄉太守郭睦及秭歸大姓艾布鄧凱等兵前後斬首招納凡數萬計大帝以遜為右護軍鎮西將軍進封婁侯後拜輔國將軍領荊州牧大帝使鄱陽太守周魴謫魏大司馬曹休休果舉衆入皖乃召遜假

黃鉞為大都督逆休

陸機為遜銘曰魏大司馬曹休侵我北鄙乃假公黃鉞統御六師及

中軍禁衛而攝行王事主上執鞭百司屈膝吳錄曰假遜黃鉞吳主親執鞭以見之休既覺知恥

見欺誘自恃兵馬精多遂交戰遜自為中部令朱桓全

琮為左右翼三道俱進果衝休伏兵因驅走之追亡逐

北徑至夾石斬獲萬餘牛馬騾驢車乘萬兩軍資器械

畧盡休還疽發背死諸軍振旅過武昌大帝令左右以

御蓋覆遜出入殿門凡所賜遜皆御物上珍於時莫與

為比遜既立大功大帝嘉遜功德欲殊顯之拜為上將

軍列侯猶欲令歷本州舉命乃使揚州牧呂範就辟別
駕從事起茂才

陸抗為奮威將軍魏將諸葛誕舉壽春降拜抗柴桑督
赴壽春破魏牙門將偏將軍遷征北將軍

賀齊為威武中郎將討丹陽黥歛大破之分歛為始新
加偏將軍新都守累破盜賊被命詣所在及當還郡大

帝出祖道作樂舞象

吳書曰大帝謂齊曰今定天下都
中國使殊俗貢珍狡獸率舞非君

誰與齊曰殿下以神武應期廓開王業臣幸遭際會得
驅馳風塵之下佐助末行效鷹犬之用臣之願也若殊

俗貢珍狡獸率衆宜
在聖德非臣所能也
賜齊駢車駿馬罷坐住駕使齊就

車齊辭不敢大帝使左右扶齊上車令導吏卒兵騎如
在郡儀大帝望之笑曰人當努力非積行累勤此不可
得去百餘步乃旋齊又與陸遜討破鄱陽尤突拜安東
將軍封山陰侯

全琮為偏將軍時蜀將關羽圍樊襄陽琮上疏陳羽可
討之計大帝時已與呂蒙陰議襲之恐事泄故寢琮表
不荅及禽羽大帝置酒公安顧謂琮曰君前陳此孤雖

不相荅今之捷抑亦君之功也於是封陽華亭侯琮又擊破魏舟軍梟其將軍尹盧遷綏南將軍進封錢唐侯呂岱為督軍校尉與將軍蔣欽將兵討平會稽東冶賊呂合秦狼等拜昭信中郎將又鎮長沙攻斬醴陵袁龍遷廬陵太守又代步騭為交州刺史討桂陽潁陽王金縛金傳送詣都斬首獲生凡萬餘人遷安南將軍假節封都鄉侯又擊破九真太守士徽大將甘醴桓治等進封番禺侯於是除廣州復為交州如故岱既定交州復

進討九真斬獲萬數徼外諸國各遣使奉貢大帝嘉其
功進拜鎮南將軍

周魴為昭義校尉建密計隨陸遜擊魏司馬曹休遜橫
截休軍斬獲萬計軍旋大帝大會諸將歡宴酒酣謂魴
曰成孤大事君之功名當書之竹帛加裨將軍賜爵關
內侯

鍾離牧為監軍使者討平建安鄱陽新都三郡亂民封
秦亭侯拜越騎校尉又五谿夷叛亂牧為平魏將軍討

平之遷公安督揚武將軍封都鄉侯

潘濬為輔軍中郎將武陵部從事樊佃誘導諸夷圖以
武陵屬蜀先主濬以五千兵斬平之遷奮威將軍封常
遷亭侯

陸凱為建武校尉討山賊陳悉於零陵斬悉克捷拜巴
丘督偏將軍封都鄉侯

吾粲為昭義中郎將與呂岱討平山越入為屯騎校尉
少府

是儀為都尉從大帝討闕羽拜忠義校尉儀陳謝大帝
令曰孤雖非趙簡子卿安得不自屈為周舍耶既定荆
州都武昌拜裨將軍封都亭侯黃武中遣儀之皖就將
軍劉邵欲誘致曹休休到大破之遷偏將軍

胡綜為右部督大帝使綜與賀齊生虜得魏蘄春太守
晉宗加建武中郎將

諸葛恪為撫越將軍領丹陽太守授祭戟武騎三百拜
畢大帝命恪備威儀作鼓吹導引歸家及到府山民去

惡從化大帝嘉其功遣尚書僕射薛琮勞軍拜恪威北將軍封都鄉侯復拜太傅會衆於東興與魏軍戰斬首數千資器山積振旅而歸進封恪陽都侯加荆揚州牧督中外諸軍事賜金一百斤馬二百匹縵布一萬疋

丁奉以驍勇為小將屬甘寧陸遜潘璋等數遣征伐戰鬪常冠軍每斬將搃旗稍遷偏將軍廢帝即位為冠軍封都亭侯魏遣諸葛誕胡遵等攻東興諸葛恪率軍拒之奉見其前部兵少奉縱兵大破敵魏軍遂潰遷滅寇

將軍進封都鄉侯魏將文欽來降以奉為虎威將軍從
孫峻至壽春迎之與敵追軍戰於高亭奉突入其陣斬
首數百獲其軍器進封安豐侯又魏大將軍諸葛誕據
壽春來降魏人圍之奉為先登屯于黎漿力戰有功拜
左將軍

冊府元龜卷三百七十七

欽定四庫全書

冊府元龜卷三百七十八 宋 王欽若等撰

將帥部

褒異第四

晉何曾魏正光中為鎮北將軍都督河北諸軍事假節
將之鎮文帝使武帝齊王攸辭送數十里曾盛為賓主備
太牢之饌侍從吏騶莫不醉飽帝既出又過其子邵曾
先勅邵曰客必過汝汝當豫嚴邵不冠帶停帝良久曾

深以譴邵曾見崇重如此遷征北將軍進封潁昌侯
石苞為奮武將軍統青州諸軍督逆擊諸葛誕兵大破
之壽春平苞拜鎮東將軍封東光侯

羊祜為征南大將軍祜以伐吳必藉上流之勢乃表王
濬為龍驤將軍令修舟楫為順流之計祜繕甲訓卒廣
為戎備乃上疏武帝深納之後詔以泰山之南武陽牟
南城梁父平陽五縣為南城郡封祜為南城侯置相與
郡公同及卒帝素服哭之甚哀是日大寒帝涕淚滂沱

鬚鬢皆為冰馬賜東園祕器朝服一襲錢三十萬布百
疋詔曰征南大將軍南城侯祜蹈德冲素思心清遠始
在內職值登大命乃心篤誠左右王事入綜機密出統
方岳當終顯烈永輔朕躬而奄忽殂隕悼之傷懷其追
贈侍中太傅持節如故喪既引帝於大司馬門南臨送
祜卒二歲而吳平羣臣上壽帝執爵流涕曰此羊太傅
之功也因以克定之功策告祜廟乃依蕭何故事封其
夫人萬歲縣君食邑五千戶又賜帛萬疋穀萬斛

杜預為征南大將軍都督荊州諸軍事預既至鎮繕兵甲耀威武乃簡精銳襲吳西陵督張政大破之以功贈封三百六十五戶預既平吳振旅凱入以功進封當陽縣侯增邑并前九千六百戶賜絹八千匹

王沈為征虜將軍持節都督江北諸軍事平蜀之役吳人大出聲為救蜀振動邊境沈鎮御有方寇聞而退轉鎮南將軍武帝受禪以佐命之勲轉驃騎將軍

賈充為典農中郎將叅大將軍軍事從景帝討毋丘儉

文欽於樂嘉以勞增邑三百五十戶後為文帝大將軍
司馬轉右長史充進計征諸葛誕帝先歸雒陽使充統
後事進爵宣陽侯增邑千戶五等初建封臨沂侯為晉
元勲深見寵異賜祿常優於羣臣伐吳之役詔充為使
持節假黃鉞大都督總統六師給羽葆鼓吹緹幢兵萬
人騎二千置左右長史司馬從事中郎將增叅軍騎司
馬各十人帳下司馬二十人大車官騎各三十人及吳
平武帝遣侍中程咸犒勞賜充帛八千匹增邑八千戶

及薨帝為之慟使使持節太常奉策追贈太宰加衮冕
之服綠綬綬御劔賜東園祕器朝服一具衣一襲大鴻
臚護喪事假節鉞前後部羽葆鼓吹緹麾大輅鑿輅輜
輶車帳下司馬大車椎斧文衣武賁輕車介士葬禮依
霍光及安平獻王故事給塋田一頃與石苞等為王功
配享廟庭自充薨至塋賻賜二千萬

高光為奉車都尉預討成都王穎有勲封延陵縣公邑
二千八百戶

王渾為征虜將軍監豫州諸軍事渾與吳接境吳將薛瑩魯淑衆號十萬渾擊破之遷安東將軍都督揚州諸軍事鎮壽春及大舉伐吳渾率師出橫江遣諸將擊破諸軍吳人大震孫皓遣司徒何植建威將軍孫晏送印節詣渾降武帝下詔曰王渾督率所統遂逼秣陵令賊孫皓救死自衛不得分兵上赴以成西軍之功又摧破大軍獲張悌使皓塗去窮勢盡固縛乞降遂平定秣陵功勲茂著其增封八千戶進爵為公賜絹八千匹轉征東

大將軍

王濬為龍驤將軍監梁益諸軍事既平吳拜濬輔國大將軍領步兵校尉舊校唯五置此營自濬始也有司又奏輔國依比未為達官不置司馬不給官騎詔依征鎮給親騎百人官騎十人置司馬封為襄陽縣侯邑萬戶賜絹萬匹又賜衣一襲錢三十萬及食物時人咸以濬功重報輕武帝乃遷濬鎮軍大將軍加散騎常侍領後軍將軍後又轉濬撫軍大將軍開府儀同三司加特進

散騎常侍後軍將軍如故太康六年卒時年八十葬栢
谷山大營塋域墓垣周四十五里而別開一門松栢茂
盛

唐彬為廣武將軍監邑東諸軍事上征吳之策甚合武
帝意後與王濬共伐吳應機制勝多所擒獲吳平帝詔
曰廣武將軍唐彬受任方隅東禦吳寇南臨蠻越撫寧
疆場有綏禦之績又每忼慨志在立功頃者征討扶疾
奉命首啓戎行獻俘授馘勲效顯著其以彬為右將軍

都督巴東諸軍事徵拜翊軍校尉改封上庸縣侯食邑
六千戶賜絹六千匹

王戎為建威將軍受詔伐吳降江夏太守劉朗及牙門
將孟泰吳平進爵安豐縣侯增邑六千戶賜絹六千疋
盧欽為淮北都督伏波將軍甚有聲績徵拜散騎常侍
吏部尚書進封大梁侯武帝受禪以為都督沔北諸軍
事平南將軍假節給追鋒軺卧車各一乘第二駙馬二
乘騎具刀器御府人馬鎧等及錢三十萬

馬隆為司馬督時涼州刺史楊欣失羌戎之和欣為虜所沒武帝以隆為武威太守假節宣威將軍加赤幢曲蓋鼓吹隆到武威前後誅殺及降附者以萬計涼州遂平加授衛將軍

胡奮為監軍假節擊斬匈奴中部帥劉猛以功累遷征南將軍假節都督荊州諸軍事遷護軍加散騎常侍張光為牙門將伐吳有功遷江夏西部都尉轉北地都尉擊破反叛氏羌擢授新平太守加鼓吹

趙誘為廣武將軍與甘卓周訪共討華軼破之又攻滅
杜弢累功賜爵平阿縣侯

周浚為折衝將軍揚州刺史封射陽侯隨王渾伐吳與
渾共行吳城壘綏撫新附以功進封成武侯食邑六千
戶賜絹六千匹

周馥為鎮東將軍與周玘等討陳敏滅之以功封永寧
伯

苟晞為北中侯及惠帝還雒陽范陽王虓承制用晞行

兗州刺史汲桑之破鄴也東海王越出次官渡以討之
命晞為前鋒晞陷其九壘遂定鄴而還西討呂朗等滅
之進位撫軍假節都督青兗諸軍事封東平郡侯邑萬
戶

劉喬為建威將軍太子洗馬以誅楊駿功賜爵關中侯
張昌之亂為威遠將軍豫州刺史與劉弘共討昌進左
將軍惠帝西幸長安喬與諸州郡舉兵迎大駕東海王
越承制轉喬安北將軍

劉琨為范陽王虓司馬及惠帝幸長安東海王越謀迎
大駕劉喬攻虓於許昌也琨與汝南太守杜育等率兵
救之未至而虓敗琨與虓俱奔河北共破東平王楙於
廩丘南走劉喬又斬石超降呂朗因諸軍奉迎大駕於
長安以勲封廣武侯邑二千戶

索靖為蕩寇將軍時西戎反叛靖屯兵粟邑擊賊敗之
遷始平內史又以左將軍討孫秀有功加散騎常侍遷
後將軍

索琳為奮威將軍時劉聰侵掠關東琳破聰黨遷新平
太守後為安西將軍馮翊太守及懷帝蒙塵長安又陷
琳糾合義眾頻破賊黨修復舊館遷定宗廟小大百戰
手擒賊帥李羌與閻鼎立秦王為皇太子及即尊位是
為愍帝琳遷侍中太僕以首迎大駕升壇授璽之功封
弋居伯累遷衛將軍及劉曜進逼王城以琳為都督征
東大將軍持節討之破曜將日逐王呼延莫以功封上雒
郡公食邑萬戶拜夫人荀氏為新豐君曜入關琳又擊

破之敗劉聰將趙染轉驃騎大將軍

周玘為建威將軍三定江南開復王畧元帝嘉其勲以玘為吳興太守封烏程縣侯帝又以玘頻興義兵勲誠並茂乃以陽羨及長城之西鄉丹陽之永世別為義興郡以彰其功

周札為寧遠將軍初討錢璿以功賜爵漳浦亭侯轉從事中郎又以徐馥平為奮武將軍吳興內史錄前後功改封東遷縣侯進號征虜將軍

周訪為揚烈將軍率眾擊破武昌太守馮翊及斬華軼
遂平江州元帝以訪為振武將軍尋陽太守加鼓吹曲
蓋復命訪與諸軍共征杜弢弢遣杜弘出海昏訪擊破
之弘奔於臨賀帝又進訪龍驤將軍王敦表為豫章太
守加征討都督賜爵尋陽縣侯又討賊帥杜曾曾等走
固武當以功遷南中郎將督梁州諸軍事梁州刺史屯
襄陽又擊破杜曾并獲第五琦胡混摯瞻等送於王敦
進位安南將軍持節都督刺史如故及卒帝哭之甚慟

詔贈征西將軍立碑於本郡

戴淵為振威將軍義軍督以討賊有功賜爵秣陵侯遷
治書御史驃騎司馬拜散騎侍郎元帝召為鎮東右司
馬將征杜弢加淵前將軍後為征西將軍都督兗豫幽
冀雍并六州諸軍事假節加散騎常侍發投刺王官千
人為軍吏調揚州百姓家奴萬人為兵配之以散騎常
侍王遐為軍司鎮壽陽與劉隗同出帝親幸其營勞勉
將士臨發祖餞置酒賦詩

應詹為都督前鋒軍事護軍將軍假節都督與建威將軍趙盾等擊敗南賊斬賊率杜發梟首數千級賊平封觀陽縣侯食邑一千六百戶賜絹五千匹後遷使持節都督江州諸軍事平南將軍江州刺史卒贈鎮南大將軍儀同三司祠以太牢

甘卓初為吳王常侍討石冰以功賜爵都亭侯元帝初渡江授卓前鋒都督揚威將軍歷陽內史討周馥征杜弢屢經苦戰多所擒獲以前後功進爵南鄉侯

葛洪為元帝丞相掾石冰作亂吳興太守顧祕為義軍都督與周玘等起兵討之祕檄洪為將兵都尉攻冰別帥破之遷伏波將軍冰平洪不論功至是以平賊功賜爵關內侯

王廙為元帝司馬預討周馥杜弢以功屢贈封邑除冠軍將軍

孔愉初叅元帝丞相軍事以討華軼功封餘不亭侯

孟觀為積弩將軍上谷郡公時氐帥齊萬年反於關中

觀大戰皆破之轉東羌校尉

劉演為北中郎將兗州刺史鎮廩丘斬王桑走趙固得
衆七千人為石勒所攻演拒戰勒退元帝拜為都督後
將軍

祖逖為奮威將軍豫州刺史給千人廩布三千疋及卒
冊贈車騎將軍

李矩為梁王彤牙門將伐氐帥齊萬年有殊功封東明
亭侯後討賊帥侯都等滅之太尉荀藩建行臺假矩榮

陽太守又破石勒衆藩表元帝加矩冠軍將軍軺車幢蓋進封陽武縣侯遷冠軍將軍矩破劉聰衆聰因憤恚而死帝嘉其功除都督河南三郡軍事安西將軍榮陽太守封修武縣侯

劉弘為寧朔將軍假節監幽州諸軍事領烏桓校尉為幽朔所稱以勲德兼茂封宣城公及卒贈新城郡公却鑿為衛將軍都督從駕諸軍事與明帝謀滅王敦又以鑿為尚書令領諸屯營平錢鳳等封高平侯賜絹四

千八百疋後進鑿都督揚州八郡軍事會蘇峻死大業
圍解及蘇逸等走吳興鑿遣參軍李閔追斬之降男女
萬餘口拜司空加侍中更封南昌縣公時賊帥劉徽聚
抄東南諸縣鑿遂城京口加都督揚州之晉陵吳郡諸
軍事率衆討平之進位太尉

華當為驃騎將軍以討王敦功封宛陵縣侯

却恢為建威將軍雍州刺史時後秦姚萇遣其子畧攻
上雒恢遣建武將軍辛恭靜救雒陽畧懼而退恢以功

進征虜將軍又領秦州刺史加督隴上軍

紀瞻為揚威將軍都督京口以南至蕪湖諸軍事以距石勒勒退除會稽內史俄轉領軍將軍瞻以久病去官明帝不聽復加散騎常侍及王敦之逆帝使謂瞻曰卿雖病但為朕卧護六軍所益多矣乃賜布千疋賊平復自表還家帝不許固辭不起詔曰瞻忠亮雅正識局經濟屢以年耆病久逡巡告誠朕深明此操重違高志今聽所執其以為驃騎將軍常侍如故服物制度一按舊典

遣使就拜止家為府尋卒冊贈本官開府儀同三司遣
御史持節監護喪事

卞敦為振威將軍領江夏相戍夏口敦攻討沔中皆平
既而杜弢寇湘中加敦征討大都督伐弢有功賜爵安
陵亭侯鎮東大將軍明帝之討王敦以為鎮南將軍假
節事平更拜尚書以功封益陽侯徙光祿勳

劉超為安東上將軍從明帝征錢鳳事平以功封零陵
伯

庾亮為都督征東諸軍事征沈充於吳興事平以功封永昌縣開國公賜絹五千四百疋固讓不受轉護軍將軍後鎮蕪湖頃之後將軍郭默據湓口以叛亮表求親征於是以本官加征討都督會太尉陶侃俱討破之進號鎮西將軍固讓初以誅王敦功封永昌縣公亮陳讓疏數十上至是許之

虞譚為輔國將軍以討沈充功進爵零陵縣侯

鄧嶽為西陽太守率衆討平郭默遷督交廣二州軍事

建武將軍領平越中郎將廣州刺史假節錄前後勲封
宜城縣伯嶽又遣軍伐夜郎破之加督寧州進征虜將
軍

鍾雅為廣武將軍時錢鳳作逆廣德縣人周玘為鳳起
兵雅討玘斬之鳳平拜尚書左丞又北中郎將劉遐卒
部曲作亂以雅監征討軍事事平拜驍騎將軍

陶侃為南蠻長史後以軍功封東鄉侯邑千戶陳敏之
亂為江夏太守加鷹揚將軍侃備威儀迎母官舍鄉里

榮之敏遣其弟恢來寇武昌侃出兵禦之又加督護使與諸軍擊恢所向必破後以母憂去職服闋參東海王越軍事江州刺史元帝加侃奮威將軍假赤幢曲蓋軺車鼓吹頃之遷龍驤將軍武昌太守王敦又表拜侃為使持節寧遠將軍南蠻校尉荊州刺史時諸將皆請乘勝擊溫邵侃以書諭之邵懼而走追獲於始興以功封柴桑侯食邑四千戶太興初進號平南將軍尋加都督交州軍事及王敦反侃以本官領江州刺史尋轉都督

湘州刺史敦得志侃復本職加散騎常侍時交州刺史
王諒為賊梁碩所陷侃遣將高寶追擊平之以侃領交
州刺史錄前後功進封征南大將軍開府儀同三司及
王敦平遷都督荆雍益梁州諸軍事領護南蠻校尉征
西大將軍荊州刺史既平蘇峻旋江陵尋以為侍中太
尉加羽葆鼓吹改封長沙郡公邑三千戶賜絹八千疋
加都督交廣寧七州軍事侃又平郭默詔侃都督江州
領刺史增置左右長史司馬從事中郎四人掾屬十二

人咸和七年侃薨成帝詔曰故使持節侍中太尉都督
荆江雍梁交廣益寧八州諸軍事荆江二州刺史長沙
郡公經德秉哲謀猷弘遠作藩於外八州肅清勤王於
內皇家以寧乃者桓文之勲伯舅是憑方賴大猷俾屏
予一人前進位大司馬禮秩策命未及加崇昊天不弔
奄忽薨殞朕震悼于厥心今遣鴻臚追贈大司馬假密
章祠以太牢魂而有靈嘉茲寵榮

温嶠為中壘將軍持節都督東安北部諸軍事時王敦

構逆嶠率衆與賊夾水戰擊王含敗之後督劉遐追錢鳳於江寧事平封建寧縣開國公賜絹五千四百疋進號前將軍又代應詹為江州刺史持節都督平南將軍鎮武昌及平蘇峻拜驃騎將軍開府儀同三司加散騎常侍封始安郡公邑三千戶及薨成帝下冊書追贈侍中大將軍持節都督刺史公如故賜錢百萬布千疋祠以太牢詔葬建平陵北

謝尚出為建武將軍江夏相成帝詔曰尚往以戎戍事要

故輟黃散以授軍旅所據險要宜崇其威望今以為南
中郎將後進號安西將軍時苻堅將揚平戍許昌尚遣
兵襲破之徵授給事中賜輅車鼓吹

王舒為撫軍將軍會稽內史時蘇峻作逆舒監浙江東
五郡軍事遣子允之督護吳郡義興晉陵三郡征討軍
事擊賊韓晃於長蕩湖大破之賊平以功封彭澤縣侯
尋卒於官贈車騎大將軍儀同三司允之討賊有功封
番禺縣侯邑千六百戶

顧眾為揚威將軍以討蘇峻功封都陽縣伯

褚靈為侍中典征討軍事時蘇峻作逆靈與陸暕出據
苑城蘇逸任讓圍之靈等固守賊平以功封長平縣
伯

毛寶為溫嶠前鋒時蘇峻作亂峻既死保守南城賊遣
韓晃攻之寶登城射殺數十人晃退賊平封州陵縣開
國侯千六百戶庾亮西鎮請為輔國將軍擊賊將石遇
破之進征虜將軍

庾懌為左衛將軍以討蘇峻封廣饒男

庾冰為祕書郎預討華軼功封都鄉侯後為奮武將軍擊走蘇峻別帥張健於吳中乘勝又遣司馬滕含攻賊石頭城拔之冰勲為多封新吳縣侯

周撫為寧遠將軍江夏相蘇峻作逆率所領從溫嶠討之峻平遷監沔北軍事南中郎將後桓溫征蜀進撫督梁州之漢中巴西梓潼陰平四郡軍事撫擊破蜀餘寇以功遷平西將軍又與龍驤將軍朱壽擊斬范賁以功

進爵建成縣公又征西督護蕭敬文作亂撫伐之敬文
出降進撫鎮西將軍及卒贈征西將軍

周楚為鷹揚將軍監梁益二州假節襲爵建城公時梁
州刺史司馬勳作逆討平之進冠軍將軍

毛穆之為安西將軍庾翼司馬翼薨大將于瓚戴羲等
作亂穆之討平之又從桓溫平蜀以功尋除揚威將軍
累遷右將軍西蠻校尉卒追贈中軍將軍

庾翼為輔國將軍假節及邽城失守石城被圍翼屢設

奇兵潛致糧杖石城得全翼之勲也賜爵都亭侯後為
征西將軍領南蠻校尉及卒追贈車騎將軍

桓石民為鎮武將軍攻破苻堅監荊州軍事西中郎將
荊州刺史擊斬并州賊黃淮以前後功進左將軍

桓石康為振威將軍荊州刺史以討庾仄功封武陵王

桓冲為鷹揚將軍鎮蠻護軍西陽太守從桓溫征伐有
功遷督荊州之南陽襄陽新野義陽順陽雍州之京兆

揚州之義城七郡軍事寧朔將軍義城新野二郡太守

鎮襄陽又從溫破姚襄及虜周成進號征虜將軍賜爵
豐城公尋遷振威將軍江州刺史領鎮蠻護軍西陽醴
二郡太守又遷車騎將軍都督江州梁益交廣寧七州
揚州之義城雍州之京兆司州之河東軍事領護南蠻
校尉荊州刺史持節將軍侍中如故冲將之鎮孝武餞
於西堂賜錢五十萬又以酒三百四十石牛五十頭犒
賜文武送至溧州後遷督荆江十郡軍事又以討降苻
堅諸將功詔賜錢百萬袍表千端

謝安為侍中都督揚豫徐兗青五州幽州之燕國諸軍事假節時苻堅彊盛疆場多虞諸將敗退相繼安遣弟石及兄子玄等應機征討所在克捷拜衛將軍開府儀同三司封建昌縣公

謝琰為輔國將軍苻堅之役與從兄玄俱陷陣破堅以勲封望蔡公

謝玄為建武將軍兗州刺史領廣陵相監江北諸軍事大破苻堅軍罷彭城下邳二戍詔遣殿中將軍慰勞進

號冠軍加領徐州刺史還於廣陵以功封東興縣侯後
又破堅衆詔遣殿中將軍慰勞進號前將軍假節固讓
不受賜錢百萬綵千疋既而安奏苻堅喪敗宜乘其釁
會以玄為前鋒都督率冠軍將軍後以充青司豫平和
加玄都督徐兗青司幽冀并七州軍事玄上疏以方平
河北幽冀宜須總督司州懸遠應統豫州以勲封康樂
縣公

桓宣為四品將軍時石勒別將圍譙城祖逖留宣討諸

未服皆破之遷譙國內史後為都督司雍梁黃州荊州之南陽襄陽新野南鄉四郡軍事以前後功封竟陵縣

男

桓伊為建威將軍歷陽太守與謝玄共破賊別將王鑿張蚝等以功封宣城縣子又進都督豫州諸軍事西中郎將豫州刺史及苻堅南寇伊與冠軍將軍謝玄輔國將軍謝琰俱破堅於淝水以功封永修縣侯進號右軍將軍賜錢百萬袍表千端後拜護軍將軍以右軍府千

人自隨配護軍府官贈右將軍加散騎常侍

朱伺為綏夷都尉時陶侃鎮江夏以伺為左甄摧破陳敏於武昌以功封亭侯領騎督累加威遠將軍督護又

以平蜀賊功加廣威將軍

毛安之為遊擊將軍孝武初擊滅妖賊盧悚遷左衛將軍及卒又追論討悚勲賜爵平都子

朱序為征討都護以討司馬勲功拜征虜將軍封襄平子後轉揚州豫州五郡軍事豫州刺史屯雒陽後丁零

翟遼反序遣將軍秦膺童斌與淮泗諸郡共討之又監
充青二州諸軍事二州刺史將軍如故進鎮彭城序求
鎮淮陰孝武許焉序還遣秦膺討翟遼子釗於陳穎走
之拜征虜將軍


劉牢之為謝玄前鋒百戰百勝牢之破苻堅將句難輜
重於盱眙獲其運船遣鷹揚將軍淮淝之役牢之進平
譙城遣龍驤將軍彭城内史以功賜爵武崗縣男食邑
五百戶

諸葛長民為揚武將軍討桓玄以功拜輔國將軍又與
劉敬宣破桓歆於芍陂封新淦縣公食邑二千五百戶
何無忌為輔國將軍既破桓玄衆侍衛安帝還京師以
無忌督豫州揚州淮南廬江安豐歷陽堂邑五郡軍事
右將軍豫州刺史加節甲杖五十人入殿未之職遣會
稽內史督江東五郡軍事持節將軍如故給鼓吹一部
義熙二年遷都督江州荊州江夏隨義陽綏安豫州西陽
新蔡汝南潁川八郡軍事江州刺史將軍持節如故以

興復之功封安城郡開國公食邑三千戶增都督司州之弘農揚州之松滋加散騎侍郎進鎮南將軍

毛璩為建威將軍益州刺史安帝初進征虜將軍及桓玄篡位遣使加璩散騎常侍左將軍璩列玄罪狀遣諸太守擊之及安帝反正詔曰夫貞松標於歲寒忠臣亮于國危益州刺史璩體識弘正誠契義旗受命偏帥次于近畿輔翼之勲實感朕心可進征西將軍都督益梁秦涼寧五州軍事行宜都寧蜀太守及遇害詔給錢三

十萬布三百足論璩討玄功追封歸鄉公千五百戶



冊府元龜卷三百七十八

欽定四庫全書

子部

冊府元龜卷三百

七十九至
八十二

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣范鰲

膳錄監生臣戴祖覃

欽定四庫全書

冊府元龜卷三百七十九

宋 王欽若等撰

將帥部

褒異第五

宋檀道濟為揚武將軍從劉道規討桓謙荀林等率厲
文武身先士卒所向摧破及徐道覆來逼道規親出拒
戰道濟戰功居多遷安遠護軍武陵內史復為太尉叅
軍拜中書侍郎轉寧朔將軍叅太尉軍事以前後功封

作唐縣男食邑四百戶補太尉主簿諮議叅軍豫章公
遷征虜將軍宋國侍中高祖受命轉護軍加散騎常侍
領石頭戍事聽直入殿省以佐命功改封永修縣公食
邑二千戶及討平謝晦遷都督江州江夏豫州之西陽
新蔡晉熙四郡諸軍事征南大將軍開府儀同三司江
州刺史持節常侍如故贈封千戶

謝晦自宋臺初建為右衛將軍尋加侍中高祖受命於石
頭登壇備法駕入宮晦領遊軍為警備遷中領軍侍中

如故以佐命功封武昌縣公食邑二千戶

王鎮惡為高祖前部破賊曹拒盧循於查浦累戰有功
封博陸縣五等子高祖謀討劉毅加鎮惡振武將軍以
討毅功封漢壽縣子食邑五百戶後為征虜將軍領安
西司馬馮翊太守遇害高祖受命追封龍陽縣侯食邑
千五百戶配食高祖廟庭

檀韶字令孫行參高祖建武將軍事都邑既平為鎮軍
將軍加寧遠將軍東海太守進號建武將軍遷龍驤將

軍秦郡太守北陳留內史以平桓玄功封巴江縣侯食邑五百戶又加寧朔將軍從征廣固攻臨朐城克之又領北琅邪太守進號寧朔將軍琅邪內史從討盧循於左里又有戰功并論廣固功更封宜陽侯食邑七百戶高祖受命以佐命功增八百戶并前千五百戶及卒追贈安南將軍加散騎常侍

向彌為寧遠將軍征破桓石等及攻壽陽克之遷建武將軍秦郡太守北陳留內史戍堂邑以平京城功封山

陽縣五等侯又遷龍驤將軍梁國內史戍壽陽以平廣固盧循功封安南縣男食邑五百戶遷冠軍將軍高祖受命以佐命功封曲江縣侯食邑千戶

劉懷慎為振威將軍彭城內史從高祖拒盧循於石頭屢戰克捷加輔國將軍晉安帝義熙八年以本號監北徐州諸軍事鎮彭城尋加徐州刺史九年亡命王靈秀為寇討平之十一年進北中郎將以平廣固盧循功封南城縣男食邑五百戶十三年高祖北伐以為中領軍

征虜將軍高祖遷都壽春留懷慎督北徐兗青淮北諸
軍事前將軍征虜將軍徐州刺史永初元年以佐命功
進爵為侯增邑千戶進號平虜將軍

劉榮祖者懷慎之庶長子也榮祖領偏師追躡盧循累
有戰功叅太尉軍從討司馬休之會賊破走加振威將
軍尋叅世子征虜軍事高祖北伐轉鎮西中兵叅軍寧
遠將軍與朱超石大破魏軍於半城又攻劉度壘克之
高祖大享戰士謂榮祖曰卿以寡克衆攻無堅城雖古

名將何以過此轉為太尉中兵叅軍加建威將軍後轉
右軍將軍時居父艱起為輔國將軍追論半城之功賜
爵都鄉侯

劉孫登為巴陵王鎮兵參軍北伐南征功冠諸將封順
陽縣侯食邑六百戶

劉粹為車騎中軍參軍從高祖征廣固戰功居多以建
義功封西安縣五等侯後遷左衛將軍以佐命功臣封
建安縣侯食邑千戶

孟懷玉為建武司馬高祖東伐豫義旗從平京城進定京邑以功封鄱陽縣侯食邑千戶又轉輔國將軍鎮丹陽府兵戍石頭盧循逼京邑懷玉於石頭南岸連戰有功為中軍諮議參軍及循平封陽豐縣男食邑三百五十戶

孟龍符為高祖建武參軍於江乘羅落覆舟三戰並有功參鎮軍事封平昌縣五等子加寧遠將軍

劉敬宣為寧朔將軍大敗吳賊進平會稽加臨淮太守

遷後軍從事中郎

檀祗為振武將軍追討桓玄每戰克捷又征亡命桓道兒張靖苻嗣等皆悉平之除龍驤將軍

朱齡石為輔國將軍巴西梓潼宕渠南漢中秦州之安固懷寧六郡諸軍事以平蜀功封豐城縣侯食邑千戶毛修之為右司馬南河河內二郡太守行西州事戍雒陽修治城壘高祖既至案行善之賜衣服玩好當時評直二十萬

孫處字季高為振武將軍高祖廣固之役先登有功又破盧循所殺萬人及卒追贈龍驤將軍南海太守封侯官縣侯食邑千戶

蒯恩為寧遠將軍擊破應城賊張堅封都亭侯又為太尉長史兼行叅軍隨朱齡石伐蜀破賊進平成都擢為參軍改封北至縣五等男恩自從征討每有危急輒率先諸將常陷堅破陣高祖錄其前後功勞封新寧縣男食邑五百戶

劉鍾為鎮軍參軍時桓歆寇歷陽高祖遣鍾助豫州刺史魏詠之討之歆即奔迸除南齊國內史封安縣五等侯自陳情事改葬父祖及親屬十喪高祖厚加資給轉騎長史又從征廣固時孟龍符陷沒鍾率左右直入取其尸而反除振武將軍中兵參軍代龍符領廣川太守又隨劉藩追徐道覆於始興斬之補太尉行叅軍寧朔將軍下邳太守代孟懷玉領石頭戍事後隨朱齡石伐蜀為前鋒平成都又以征廣固功封永新縣男食邑五百

戶遷給事中太尉參軍事龍驤將軍高陽伯高祖北伐
留鍾居守增其兵力又命府置佐吏荊州刺史劉道憐
獻名馬三匹并精麗乘具高祖悉以賜鍾三子

虞丘進初隨謝玄討苻堅有功封關內侯從高祖征孫
恩頻戰有功又從平京城定京邑除燕國內史又從征
劉毅事平補太尉行參軍尋加龍驤將軍高祖以其前
後功封望蔡縣男食邑五百戶加振威將軍討司馬休
之又有戰功軍還除輔國將軍及卒追論討休之功進

爵為子增邑三百戶

胡藩初參高祖軍事討盧循於左里頻戰有功封吳平縣五等子除正員郎後為寧朔將軍以平司馬休之及廣固功封陽山縣男食邑五百戶

庾登之為高祖鎮軍參軍以預討桓玄功封曲江縣五等男

王淮之參高祖車騎中軍事預討盧循功封都亭侯

沈叔任初為高祖太尉參軍朱齡石之伐蜀為齡石建

威府司馬加建威將軍平蜀之功亞於元帥蜀平即本
號為西夷校尉巴西梓潼郡太守高祖討司馬休之齡
石遣叔任率軍來會時高祖領鎮西將軍命為司馬及
軍還以為揚州別駕從事史以平蜀全涪之功封寧新
縣男食邑四百四十戶

柳叔仁為梁州刺史黃門郎以破臧質功封宜陽侯食
邑八百戶

沈璞為宣威將軍守盱眙後魏攻之璞堅守拒退太祖

嘉璞功效遣中使褒美詔曰近者險急老弱殊當憂迫
念卿爾時難為心想百姓轉已還退此部運尋至委卿
贍濟也

劉道錫為廣威將軍巴西梓潼二郡太守為氐羌所攻
道錫保城固守太祖下詔曰前者兵寇攻逼邊情波駭
道錫獎率文武盡心固守保全之績厥效可書可冠軍
諮議參軍

蕭思話為寧朔將軍太祖元嘉十四年遷使持節臨川

王義慶平西長史南蠻校尉太祖賜以弓琴手勅曰前
得此琴云是舊物亦有名京邑今以相借因是戴顓意
於彈撫響韻殊勝直爾嘉也并往桑弓一張材理乃快
先所常用既久廢射又多病畧不能制之便成老公令
人嘆息良材美器宜在盡用之地丈人真無所與讓也
及元凶弒立以為徐兗二州刺史思話即率部曲還彭
城起義以應世祖及即位徵為散騎常侍尚書左僕射
固辭不受改為中書令丹陽尹常侍如故

趙倫之為雍州刺史世祖北伐倫之遣順陽太守傅弘之等破姚泓於藍田及帝受命以佐命功封霄城縣侯王謙之世祖初歷驍騎將軍御史中丞吳興太守以南下之功封石陽縣子食邑五百戶

柳元景河東人為冠軍司馬世祖討元凶加冠軍將軍為前鋒世祖至新亭即位以元景為侍中領左衛將軍轉使持節監雍梁南北秦四州荊州之竟陵隨二郡諸軍事前將軍寧蠻校尉雍州刺史帝在巴口問元景事

平何所欲對曰若有過恩願還鄉里故有此授

張興世為南中郎參軍督護入討元凶為前鋒事定轉
員外將軍領從隊南郡王義宣反又隨王玄謨出梁山
有戰功除建平王中軍行參軍領長刀

顏師伯為寧遠將軍東陽太守臧質反領兵以備東道
事寧領步兵校尉領前軍將軍從御史中丞遷侍中世
祖以其伐逆寧亂復下詔封平都縣子遷右衛將軍又
為持節督青冀二州徐州之東安東莞兗州之濟北三郡

諸軍事輔國將軍擊魏師大破之進號征虜將軍

劉延孫為鎮軍將軍南徐州刺史延孫遣中兵參軍杜
幼文率軍渡江受沈慶之節度討竟陵王誕進號車騎
將軍加散騎常侍給鼓吹一部

卜天生為西陽王子尚撫軍參軍加龍驤將軍隸沈慶
之攻廣陵城天生推車塞塹率數百人先登西北角徑
至城上賊為重柵斷攻道苦戰移日不拔乃還世祖詔
曰天生始受戎任甫造寇壘而投輪越塹率果先騰驍

壯之氣嘉嘆無已可且賜布千疋以厲衆校

劉秀之為寧遠將軍西戎校尉元凶弒逆秀之聞問即
日起兵事寧遷寧朔將軍益州刺史及南譙王義宣據
荊州為逆秀之遣中兵參軍韋山松襲江陵進號征虜
將軍以起義功封康樂縣侯食邑六百戶

顧彬之為寧朔將軍世祖入討元凶劭彬之受竟陵王
誕節度誕遣叅軍劉季之與彬之并勢自頓西陵以為
後繼劭遣將軍華欽庾導東討與彬之弟相逢於曲阿

之奔牛塘路甚狹左右皆悉入菰葑彬之軍人多齎藍
屨於葑中夾射之欽等大敗事平彬之封陽新縣侯食
邑千戶季之零陽縣侯食邑五百戶

沈慶之為步兵校尉自太祖北伐時亡命司馬黑石廬
江叛吏夏侯方進在西陽五水誑動羣蠻自淮汝至于
江沔咸懼其患帝遣慶之督諸將討之及世祖踐阼以
慶之為領軍將軍加散騎常侍尋出為南兖州刺史鎮
盱眙帝伐逆定亂思將帥之功下詔封慶之南陽縣公

食邑三千戶又魯爽反慶之討平之進號鎮北大將軍
督青冀幽三州給鼓吹一部及竟陵王誕據廣陵反以
慶之為車騎大將軍既平誕進司空固讓於是與柳元
景並依晉密陵侯鄭褒故事朝會慶之位次司空元景
在從公之上給衛吏五十人門施行馬慶之以郡公就
第每從遊幸及校獵據鞍陵厲不異少壯太子妃上世
祖金鏤七箸及杆杓帝以賜慶之曰卿辛勤匪殊歡宴
宜等且觴酌之賜宜以大夫為先也前廢帝即位賜慶

之几杖給三望車一乘

劉劭為寧遠將軍自太祖元嘉末蕭簡據廣州為亂劭討之以功封大亭侯世祖大明初劉道隆請為寧朔司馬竟陵王誕據廣陵為逆劭隨道隆受沈慶之節度事平封金城縣五等侯除西陽王子尚撫軍先是遣費沈伐陳檀不克乃除劭為龍驤將軍既至進討隨宜翦定還除新安王子鸞撫軍中兵叅軍太宗即位加寧朔將軍及江州刺史晉安王子勛為逆四方響應豫州刺史

殷琰反叛徵勳還都假輔國將軍率衆討破琰除輔國
將軍廣州刺史

柳光世為左將軍直閣太宗定亂以參謀功為右衛將
軍封開國縣侯食邑千戶

殷孝祖為積射將軍世祖初累與魏軍戰頻大破之還
授太子旅賁中郎將加龍驤將軍又竟陵王誕據廣陵
為逆孝祖攻誕有戰功遷西陽王子尚撫軍寧朔將軍
廢帝景和初以本將軍督兖州諸軍事兖州刺史太宗

即位四方反叛徵之孝祖棄妻子率文武還都進號冠軍假節督前鋒諸軍事因遣向虎檻拒對南賊御仗先有諸葛亮笏袖鎧帽二十五石弩射之不能入帝悉以賜孝祖

吳喜假建武將軍時太宗初即位四方反叛喜所至克捷遷步兵校尉封竟陵縣侯食邑千戶又遷輔國將軍平定荊州遷前軍將軍增邑三百戶

沈攸之為寧朔將軍尋陽太守破南賊於赭圻太宗尋

假攸之節進號輔國將軍代殷孝祖督前鋒諸軍事尋
克赭圻遷使持節督雍梁南北秦四州郢州之竟陵諸
軍事冠軍將軍領寧蠻校尉雍州刺史又進平尋陽徙
監郢州諸軍事前將軍郢州刺史持節如故不拜遷中
領軍封貞陽縣公食邑二千戶

王玄謨為領軍將軍太宗即位四方反叛以玄謨為大
統領水軍南討以脚疾聽乘輿出入平尋陽除大將軍
江州刺史副司徒建安王於赭圻賜以諸葛亮笥袖鎧

黃回為龍驤將軍攻合肥破之太宗以其功封葛陽縣男食邑二百戶後廢帝時以屯騎校尉討桂陽王休範事平轉驍騎將軍加輔師將軍進爵為侯封聞喜縣後遷冠軍將軍率軍前討建平王景素平之增邑五百戶進號征虜將軍加散騎常侍

彭文之為龍驤將軍以討建平王景素功封葛陽縣男食邑三百戶

任農夫為彊弩將軍太宗初以東討功封廣普縣子食

邑五百戶東土平定又南討增邑二百戶為左將軍討桂陽王休範以戰功改封孱陵縣侯增邑千戶并前千七百戶

高道慶以軍校平桂陽王休範功封樂安縣男食邑三百戶

南齊蕭赤斧宋孝武時為軍主竟陵王誕反廣陵隸沈慶之圍廣陵城攻戰有勲事寧封永安亭侯食邑三百七十戶至世祖時為左衛將軍親遇與寧朔將軍蕭景

先相比封南豐縣伯邑四百戶

王廣之宋明帝泰始初為寧朔將軍北征沈文秀其長
廣太守劉桃根棄城走軍還封安蠻縣子邑三百戶後
為冠軍將軍討宋建平先登京口改封寧都縣子邑五
百戶太祖即位進爵為侯食邑千戶

張瓌為驍騎將軍沈攸之事起劉秉弟遐聚眾治攻具
瓌部曲斬遐獻捷太祖即授輔國將軍吳郡太守封瓌
義成縣侯邑千戶建元元年增邑二百戶尋改封平都

遷侍中加領步兵校尉

垣崇祖為遊擊將軍使持節監豫司二州諸軍事魏軍
寇壽春崇祖召文武議當用謀以制之堰淝水為險魏
衆攻城人馬溺死數千大衆皆退走初崇祖在淮陰見
太祖自比韓信白起咸不信唯太祖獨許之崇祖再拜
奉旨及破虜啟至太祖謂朝臣曰崇祖許為我制虜果
如其言且嘗自擬韓白今真其人也進為都督號平西
將軍增封千五百戶崇祖聞陳顯達李安民皆增給軍

儀啟上求鼓吹橫吹太祖勅曰韓白何可不與衆異乃給鼓吹一部

張敬兒為輔國將軍持節都督雍梁二州郢司二郡軍事沈攸之事起敬兒遣使告變太祖大喜進號鎮軍將軍加散騎常侍改為都督給鼓吹一部

王敬則為冠軍將軍沈攸之事起太祖入守朝堂表檠起兵夕領軍劉韞直閣將軍卜伯興等於宮內相應戒嚴將發敬則開闕掩襲皆殺之殿內竊發盡平敬則之

力也遷右衛將軍增封為二千五百戶尋又加五百戶
齊臺建為中領軍建元元年出為使持節散騎常侍都
督南充兗徐青冀五州軍事平北將軍南兗州刺史封
尋陽郡公邑三千戶加敬則妻懷氏爵為尋陽國夫人
遷護軍常侍如故以家為府以改葬去職詔贈敬則母
尋陽國公太夫人改授侍中撫軍將軍太祖遣詔敬則
以本官領丹陽郡尹尋遷為使持節散騎常侍都督會
稽東陽新安臨海永嘉五郡軍事會稽太守世祖永明

二年給鼓吹一部

陳顯達為冠軍將軍沈攸之事起顯達遣軍援臺攸之
平除左衛將軍轉前將軍太祖太尉左司馬齊臺建為
散騎常侍左衛將軍領衛尉太祖即位遷中護軍增邑
千六百戶轉護軍將軍顯達啟讓帝曰朝廷爵人以序
卿忠調發萬里信誓如期雖屠城殄國之勲無以相加
此而不賞典章何在若未必宜爾吾終不忘授於卿數
士意同家人豈止於君臣耶世祖永明八年遷侍中鎮

軍將軍尋加中領軍出為使持節散騎常侍都督江州諸軍事征南大將軍江州刺史給鼓吹一部後遷車騎將軍開府預廢鬱林之勲為司空進爵為公甲仗五十人入殿明帝即位進太尉侍中如故改封鄱陽郡公加兵二百人給油絡車

劉懷珍為左將軍沈攸之圍郢城懷珍遣建寧太守張謨等破賊前鋒進平南將軍增督南豫北徐二州增邑為千戶

李安民為冠軍將軍南兗州刺史沈攸之反太祖召安民以本官鎮白下治城隍加征虜將軍進軍西討又進前將軍行至湓城沈攸之平仍授督郢州司州之義陽諸軍事郢州刺史又遷左衛將軍領衛尉太祖即位為中領軍封康樂侯邑千戶尋為領軍將軍魏兵寇壽春至馬頭詔安民出征加鼓吹一部

垣榮祖為驍騎將軍太祖以預佐命勲封將樂縣子邑三百戶

周山圖宋明帝時為殿中將軍時四方反叛僕射王彧
舉山圖將領明帝呼與語甚悅使領百舸為前驅舉軍
主校長生等攻破賊湖白赭圻二城除員外郎加振武
將軍預平濃湖追賊至西陽還明帝賞之賜苑西宅一
區沈攸之事起世祖為西討都督啟山圖為軍副山圖
斷取行旅船板以造樓櫓立水柵旬日皆辦世祖甚嘉
之授前將軍加寧朔將軍進號輔國將軍攸之攻城世
祖令山圖量其形勢攸之既敗太祖遣山圖領部曲鎮

京城鎮戍悉受節度遷遊擊將軍太祖建元元年封晉興縣男邑三百戶後轉黃門郎領羽林四廂直衛及疾帝手勅參問遣醫給藥以世祖永明元年卒召賜朝服一具衣一襲

呂安國為建威將軍宋明帝泰始中征殷琰於壽春安國與輔國將軍桓閔屯據城南於是衆軍繼至安國勲第一封彭澤縣男未拜改封鍾武縣加邑為四百戶後為征虜將軍沈攸之事起太祖以安國為湘州刺史時

任侯伯行湘州事侯伯與黃回袁粲謀石頭事太祖令
安國至鎮收侯伯誅之尋進號前將軍建元元年進爵
增邑六百戶

薛淵為輔國將軍沈攸之之難太祖入朝堂淵率軍赴
難及太祖即位增邑為二千五百戶加寧朔將軍

戴僧靜為游擊將軍預平沈攸之太祖論封諸將以僧
靜為興平縣侯邑千戶及即位增邑千二百戶

桓康為冠軍將軍太祖時康於淮陽大破魏軍以康持

節督青冀二州東徐之東莞琅邪二郡朐山戍北徐之東海漣口戍諸軍事世祖即位轉驍騎將軍卒詔曰康昔預南勲倍深惻愴凶事所須厚加料理

曹虎為屯騎校尉預平石頭功封羅江縣男除前軍將軍太祖受禪增邑為四百戶

蕭景先為世祖征虜府司馬領新蔡太守隨鎮湓城沈攸之事平還都除寧朔將軍太祖即位遷太子左衛率封新吳縣伯邑五百戶出為持節督司州軍事寧朔將

軍時魏軍出淮泗景先斷塞關隘魏軍退進號輔國將軍後為征虜將軍丹陽尹卒詔賻錢十萬布二百疋贈侍中征北將軍南徐州刺史給鼓吹一部

崔慧景為西戎校尉梁南秦二州刺史攻擊烏奴大敗之世祖以慧景進號冠軍將軍

裴叔業為寧朔將軍時魏軍圍徐州叔業攻魏柵外二城克之明帝以叔業有勲勞封武昌縣伯五百戶

蕭坦之為右衛將軍督徐州征討軍事魏軍圍鍾離坦

之擊破之還遷領軍將軍後加右將軍督衆軍討始安
王遙光屯湘宮寺事平遷尚書右僕射丹陽尹進爵為
公增邑千戶

沈文季為冠軍將軍督吳錢塘軍事沈攸之反文季收
殺攸之宗族太祖加文季持節進號征虜將軍封畧陽
縣侯邑千戶至明帝時加散騎常侍建武二年魏軍寇
壽春詔文季領兵鎮壽春魏軍尋退增封為千九百戶
尋加護軍將軍

張冲為冠軍將軍都督青冀二州北討諸軍事東昏時
魏軍攻司州冲遣軍主杜僧護力戰大破之遷廬陵王北
中郎將司馬加冠軍將軍

冊府元龜卷三百七十九